

2

TRACTATIO

QVÆSTIONIS, QVO

IVRE EPISCOPORVM

residentia debeat,

PER F. AMBROSIVM CA=

THARINVM POLITVM

BPISCOPVM MI=

NORIENSEM.



Cum Privilegio.

13

VIVO MORTE.



REFLECTA ME A.

Venetiis⁹⁴ apud⁷ Gabrielem
Iolium de Ferrariis.

MDXLVII.

15

TRACTATIO

OF THE
LAW

IN THE
COURT

OF THE
COMMONS

IN THE
YEAR

OF THE
CITY



THE
LAW
OF
THE
CITY
OF
CAMBRIDGE
IN
THE
YEAR
OF
THE
CITY
OF
CAMBRIDGE
IN
THE
YEAR
OF
THE
CITY
OF
CAMBRIDGE

THE
LAW
OF
THE
CITY
OF
CAMBRIDGE
IN
THE
YEAR
OF
THE
CITY
OF
CAMBRIDGE

REVERENDISSIMO ET ILLU-
 strissimo Domino D. Ioanni Mariæ de Monte
 S. R. Ecclesiæ Card. Episcopo Prænestino,
 & sanctissimi Domini nostri Papæ
 IN GENERALI. S. SINO DO
 Bononiensi Legato F. Ambrosius Ca-
 tharinus Politus Episcopus
 Minorienfis. S.



EMINISTI Reuerendissime
 atque Illustrissime Domine, quum
 ageremus Tridenti, quomodo om-
 nes patres abominati segnitiã atq;
 socordiam prauorum Antistitum,
 eleganti Decreto innouantes anti-

quos canones, & pœnas grauiores adiicientes, ipso-
 rum debitam residentiam unanimiter statuerunt. Nec
 te fugit aliquos eam introducere quæstionem uoluis-
 se ibi definiendam, uidelicet, an eiusmodi residentia sit
 iure diuino præcepta, quod & tu, et amplissimus Col-
 lega tuus, prudenti consilio non permisistis, cum sanè
 perspiceretis eam rem ad reformationem, quæ solū-
 modo desiderabatur, parum cōducere, & ipsam quæ-
 stionem habere deficultates & nodos, non à quolibet
 fortassis facile explicabiles. Nam nec inter Patres cō-
 ueniebat: ego enim etsi non indicarim aperte quid sen-
 tirem, palàm tamen dixi eos qui iure diuino præce-
 ptā esse assererent, hoc rationibus non euincere. Qua-
 de re cum nonnullos audissem submurmurare, quod

deputarent aut indoctè, aut obsequij potius gratia, quàm
ueritatis, eam esse interloquutum, cum tu etiam eadem
quæ nos probare uidereris, duxi tunc in animum
meæ sententiæ rationem in scriptis exponere, et in-
dicare ijs qui secus suspicarentur, me ferunt potius
esse disputatorem, quàm blandum assentatorem. Quod
et certè ab animo meo (Deo gratia est) alienissimum
semper fuit. Verùm cum alia studia me aliò traherent,
distuli opus, et iam abierat in obliuionem, donec
tandem amici mei nuper in hanc operam me detruserunt,
quorum gratia appuli animum, unam aut alteram
lucubrationem huic tractatui impendere. Et ecce
natum est opusculum, quod et tibi dono do, ut quum
à grauioribus tuæ legationis negotijs fueris feriatus,
et à podagræ chiragræquè doloribus (quibus interdum
paulò sæuius opprimeris) inducias aliquas obtinueris,
legas quæ de ea scripsi, et intelligas, et iudicium
tuum proferas, quod quanti faciam si expressero, ue-
reor ne rursus in aliquam adulationis suspensionem
incurram, tametsi magnis argumentis aliàs ostentaue-
rim nescire me in huiusmodi cuiquam mortalium adu-
lari. Verùm quis prohibeat quò minus suspicentur ho-
mines ut libet? Quid mihi oberit si, quod officij mei
est, inoffenso prosequar pede? scilicet ut in pulcher-
rimam solius ueritatis speciem intuitum oculorum meo-
rum desigens, nihil illi præferam, ut par est, nec me
ipsum? Vale Domine, ac patrone mi Reuerendissime
et Illustrissime. Bononiæ. 8. Cal. Maias 1547.

TRACTATIO QVAE-
STIONIS, QVO IVRE EPI-
SCOPORVM RESIDENTIA
DEBEATUR, PER F.
AMBROSIVM CATHARI-
NVM POLITVM EPISCOPVM
MINORIENSEM.



NON Puto aliquem
adeo uel desipere, uel
insolescere, ut existi-
met, aut ausit etiam af-
serere, episcopum nō
teneri personaliter re-
sidere in loco ecclesiæ
sibi cōmissæ, nisi uel necessitas (quæ legi
subiecta non est) impediatur, uel maior ec-
clesiæ utilitas aliud requirat, cum cano-
nes hoc abominentur & puniant. Sed il-
lud uertitur in quæstionem, utrum hæc
obligatio ad residendum sit iuris diuini,
an potius canonici & ecclesiastici. Mit-
to hic inquirere, an de iure naturali: quia
ius naturæ ignorat ecclesiasticam hierar-

chiam, quā illa posita, non est diffiden-
dum ratione naturali, id est, ratione quæ
a lumine naturali uenit, posse disquiri,
quatenus hæc residentia ab episcopo de-
beatur: hoc enim faciemus nos differen-
tes, quod facere nō possemus, nisi quod
circa hoc censeat ius ipsum diuinum, &
canonicum, siue ecclesiasticum, præno-
uerimus.

Igitur pro huius rei intelligentia, prius
oportet definire quid est, quod dicimus
esse aliquid iuris diuini. Hic enim accipi-
endū est ut distinguitur ab humano, uel
naturali, uel ciuili iure, uel etiam eccle-
siastico.

Primo igitur & proprie, iuxta doctri-
nam D. Thomæ & ueritatem, illud esse
diuinum ius intelligo, quod Deus ore
proprio loquutus est & expressit: & cō-
sequenter ex eo quod est expressum ma-
nifesta, & necessaria consequentia dedu-
citur, ut non sit opus nouo præcepto, cū
satis in eo, unde deducitur, contineatur,
exempli gratia. Præceptum charitatis ex-
pressit Dominus ore suo: Proprie ergo,
ac primo, diuini iuris esse non dubita-

mus. Ex hoc autē præcepto clare deducitur usuram non esse licitam, cum proculdubio non diligit homo proximum suum, sicut seipsum, qui illum usuris premit. Quamobrē usuram diuino iure esse prohibitā, etiam si nullum aliud expressum inueniretur dei præceptū de illa, minime dubitandum est, nec opus esse dicere ullo hominum præcepto ut illicita fieret, forte ut declararetur hominibus improbis, aut sensu imbecillis. Nec decipiatur quisquā existimans hoc pacto, q̄ quæcunq; nobis præcipit ius canonicum, iuris diuini dici possint, eo q̄ necessitas illa seruandī sit iuris diuini, dicente domino. Qui uos spernit, me spernit. Vt enim sit aliquid iuris diuini, oportet ut super illud diuinum præceptū cadat, & non super necessitatem obtemperandi: exempli gratia. Debere sacerdotē continere, dicimus esse ecclesiastici iuris non diuini, cum non sit hoc ulla diuina uoce expressum, nec ab expressis necessaria consequentia deducatur. Et nihilo minus hoc, quod huic præcepto ecclesiastico debeat obtemperare sacerdos, iu

ris est diuini. Quo in loco etiam confi-
derandum est, & diligenter animadu-
rendū ne erremus, longe aliud esse col-
ligi aliquid de scripturis ut præceptum,
aliud uero ex illis accipi ut præcipiendū.
Cælibatus enim sacerdotum, & si in scri-
pturis nō uideatur præceptum, nec uere
sit, attamen ex ipsis scripturis accipimus
esse bonum & utilem, & cōuenientem
tanto officio & ordini, ac propterea di-
gnum ut ab ecclesia præcipiatur, sicut &
factum est. Nouo enim ecclesiæ præce-
pto fuit opus in hac re.

Concludo ergo quod sicut hæreticus
est, non solum qui negat q̄ expressa sunt
in scripturis, uerum etiam qui ea negat,
quæ in iis, quæ sunt expressa, cōtinentur,
& inde necessaria atq; euidenti conse-
quentia deducuntur, ita diuini iuris præ-
uaricator est, non solum qui transgredi-
tur quod ibi expresse præcipitur, uerum
etiam qui id quod inde euidenter dedu-
citur, prætermittit.

His præmissis, si sic accipitur ius diui-
num, ut declarauimus, & sicut re uera
lebet, secundum distinctam & propriam
significationē

significationē uocis, sicut dicitur ius naturale, quia a natura dictatur, & ius humanū quod a ratione seu dictamine humanæ rationis descendit, respondentes nunc ad quæstionem, primum dicimus, Non illud quæri, utrum residentia episcopi sit iuris diuini, tanquā sit expresso uerbo a Deo præcepta, Nā si ita esset, nimis turpiter in quæstionem uerteretur. Quis enim, præsertim catholicus, audeat quicquā opponere uerbo Dei? sed in hoc quæstio est, utrum ex aliquo expresso Dei præcepto in cōsequentia euidētis hoc deducatur. Sunt enim qui hoc proculdubio existimant, & his modis argumētatur. Episcopatus, id est, ordo ipse & officium, sine dubio a Deo est, & iure diuino institutū, & ad hoc institutum ut curentur oues Christi. Vnde B. Paulus Episcopatū bonum opus appellat. Cura igitur pastoralis de iure diuino est. Hæc uero absq; personali & assidua residentia præstari non pōt. Personalis igitur residentia, et illa assidua, iuris est diuini. Qui enim certum quid præcipit, etiam illud præcipere censendus est, sine quo præce

pto illud prius præstari nō potest. Quod
si quis dixerit etiam sine assidua residen-
tia præstari posse curam: quia episcopus
per alios pastoralia munera exercere po-
test, cum nullum sit non delegabile, Cō-
tra hoc instant, primo, quia dictum est
Petro, Pasce oues meas, & non est illi di-
ctum, mitte alios ad pascendum. Quod
autem dictum est Petro ut pastori, etiam
omnibus episcopis & pastoribus, in eius
persona dictum esse recipiendum est.

Secūdo, quia Dominus ipse designat no-
bis bonū pastorem in illo qui intrat per
ostium, qui oues uocat nominatim, &
mittit eas, & ante eas uadit, & cætera q̄
perfecto præsentiam pastoris uidentur
requirere.

Tertio, Episcopi dicuntur succedere in lo-
cum Apostolorum: Apostolis autem ita
fuit demandata cura euangelii prædicā-
di, ut hoc per seipsos facere tenerentur.
Vnde B. Paulus. Væ mihi, si non euange-
lizauero, necessitas enim mihi incūbit.

Quarto, quia quum consecratur episco-
pus, expresse ei dicitur, Vade & prædica
populo Dei, & non dicitur, mitte alios

ad prædicandum.

Quinto, quia Apostolus ait, Oportere episcopum esse doctorem. Frustra autem hoc si per alios posset prædicare & docere. Si ergo ut per se doceat necesse est, profecto præsentia & residentia eius est necessaria: doctrina enim in aures instillatur. Denique sunt alia multa episcopalia munera quæ aut conuenienter requirunt ipsius episcopi præsentiam, aut etiam (ut quidam uolunt) necessario. Est enim primum debita uisitatio, quæ etsi per alios fieri posset, non tamen ita conuenit: ad hoc enim illud prouerbiū trahi potest. Pes domini impinguat agrum, & oculus equum. Et scriptum est pastoribus, Agnosce uultum pecoris tui. Nam quæ illi debentur, longe cōuenientius a proprio & ordinario præstatur, q̃ a Vicariis & subdelegatis. Hæc sunt enim pastoris officia apud Ezechielē, sanare egrotos, cōsolidare infirmos, alligare cōfractos, reducere abiectos, reuocare deuios, requirere perditos, denique bene habentes custodire & cōseruare, hæc autem absque dubio magis conuenit, ut faciat episcopus.

pus loci ordinarius, q̄ alius quisq̄ pro eo.
Et cum ius, id quod conuenientius est,
exigere uideatur, restat ut episcopus resi-
dere teneatur. Sunt etiam, ut aiunt qui-
dam, quæ non possunt nisi a proprio or-
dinario episcopo fieri de iure diuino, ut
sunt, quæ nisi ab episcopis exerceri non
possunt, sicut est, consecrare, benedicere,
ordinare, confirmare. Nec obstat si
quis dicat hæc fieri posse per alium epi-
scopum. Si enim, ut iam statuerunt, qui-
libet tenetur hæc impendere suæ eccle-
siæ, profecto non poterit unus simul fa-
cere satis duabus aut pluribus, præsertim
cum sint aliqua munera quæ dies certos
requirant, ut sunt quædam consecratio-
nes & ordinationes. Quod si quis respō-
deat, hæc fieri posse per titulares episco-
pos, qui cura uacāt in ecclesiis suis. Aiūt,
q̄ inueniri huiusmodi titulares episco-
pos est per accidens, quod est contēnen-
dum ab arte.

¶ Aliud argumētum, q̄ residentia iuris
diuini sit, sumitur ab absurdo. Si enī non
sit iuris diuini, contraria consuetudine,
& similiter contrario statuto tolli pos-

set, & passim circa illam a Pontifice dispensari: quæ tanq̃ manifeste absurda relinquuntur.

¶ Est & tertium argumētum adiectum huiusmodi. Episcopus proculdubio de iure diuino petit mercedem operis sui, dicente Domino, Dignus est operarius mercede sua. Cur igitur (aiunt) non etiā iure diuino debeat gregi officium suū, uidelicet prædicationis & residentia?

¶ Addo ego & fortius quarto loco. Fingamus nullum esse de hoc ecclesiasticū ius, quo imperetur residentia, quæso nō ne residentia debebitur? Si negatur, manifestum uerum negari uidetur, & non nisi absurde. Sin autem cōceditur, debetur ergo residentia, & non iure ecclesiastico, ergo iure diuino.

¶ Addunt quinto, & ipsius rei naturā. Episcopus enim & ecclesia, quasi sponsus & sponsa censentur: quare & indiuiduam uitæ consuetudinē poscunt. Quomodo igitur Pontifex sepabit eos, quos Deus ipse coniunxit? Si enim carnis uinculum non dissoluit etiam Papa, quæ potestate uinculū spiritus dissoluet. Quod

si quis actus Pontificum obiciet, quos facile dispensare uidemus, & quidem cum Cardinalibus regulariter, & cum aliis etiam curialibus, qui uaria ibi exercent officia. Respondent, inter abusus hæc computari. Scio posse aliquem nos interpellare & dicere, quod licet prædicta argumenta uideantur probare debitam residentiam, non tamen probant illam deberi assiduam, tum quia multi sunt casus, in quibus absque uiolatione præcepti licet episcopo a loco suæ cathedræ abesse, tum uero quia præceptum est affirmatiuum, cuius natura est, ut licet semper obliget, ut aiunt scholastici, non tamen ad semper. Occurrit autem hic Caietanus, & ait, A pastore exiguntur illi actus supradicti in Ezechiele, quos aut continuum, aut frequens ualde tempus exigere constat, & ratione eorum tenetur episcopus continue in episcopatu residere, quoniam tanta temporis frequentia continuam exigit residentiam, tum ex frequentia exercitii actuum huiusmodi, tum ex præparatione ad istos actus. Nam licet omne tempus non occupetur in exercitatione actus pasto-

ralis, nullum tamē tempus est exemptū,
in quo non oporteat episcopum esse pa-
ratum ad exercitationem actus pastora-
lis. Et quia actus pascendi est principalis
actus episcopi, iuxta uerbū Domini ad
uniuersalē ecclesiā episcopū, *Pasce oues
meas*, & ex principali actu iudicium fu-
mendum est, ideo per se loquēdo, episco-
pus tenetur sub praecepto ad continuam
residentiam in suo episcopatu, ita quod
hoc praeceptum affirmatiuum, ex natura
rei praeceptū, sicut habet locum determi-
natū, scilicet propriam diācesim, ita ha-
bet tempus determinatū scilicet assidue.
Et sic licet praecepta affirmatiua formaliter
obligent semper, sed non ad semper,
sed pro loco & tempore, quo oportet, et
in hoc differant formaliter a negatiuo,
hoc tamē praeceptū gratia materiae, obli-
gat ad semper, seu assidue, quod est quasi
semper, & ad certum locum, hāc ille. Et
hāc sunt quae pro ea parte adducuntur,
quae asserit, Residentiam & illam quidem
assiduam iure diuino praeceptam esse.
¶ Econtrario autem, q̄ huiusmodi resi-
dentia non sit iuris diuini, probari satis

uidetur, quia a nulla scriptura episcopis
uidetur præcepta residentia. Et iura ipsa
canonica hanc præcipiunt quæ & cum
uituperant non residentem episcopum,
manifeste, non quasi cōtra ius diuinum,
sed quasi transgredientem canonū insti-
tuta, eum uituperant, ut patet in Decret.
de cler. non residen. cap. ii. & per totum.
Magnum profecto argumentum hoc,
cui & aliud annectitur non minus con-
siderandum, nempe hoc quodcūq; sua
pte natura mutabilitatem ac uarietatem
recipit gratia materiæ, non est eorū quæ
sunt iuris diuini, sed recipit determina-
tionem ab ecclesia, & ideo quantum ad
hoc iuris canonici fit & ecclesiastici. exē-
pli gratia confessio peccatorum iuris di-
uini est, q̄ autem tali tempore tali modo
id est aut proprio sacerdoti aut habenti
iurisdictionem delegatam & quæ huius-
modi sunt uarietatibus subiecta non iu-
ris diuini, sed canonici iuris dicuntur.
Quod autem modus residentia episco-
pi, id est assiduitas eius, sit subiecta uarie-
tati coactus est confiteri tandem Caieta-
nus. Et ideo in illorum gregem transire
oportet

oportet quæ sunt canonici & ecclesiastici iuris, propter determinationem salutem quâ ius ipsum diuinum non facit, Sicut accidit in his quæ sunt iuris ciuilibus determinantia ius naturale, ut possem hæc facile multis illustrare exemplis, quæ breuitatis gratia prætereo.

¶ Nunc igitur, quoniâ in superioribus argumentis argutias & captiones cōspicimus, quantum datur, ad ueritatem, nō ad obsequium hominum attendentes, rem breuiter per conclusiones aperiemus, ut inde pateat solutio obiectorum.

¶ Prima conclusio sit, Episcopatū, hoc est, ordinem ipsum episcopatus, & consequenter officium & curam, esse de iure diuino, hoc est, inuētum & institutum a Christo, qui dixit Petro. Pasce oues meas: & alios etiam Apostolos fecit episcopos quum dixit, Sicut misit me Pater & ego mitto uos. Accipite spiritum sanctū &c. & hinc sequi, quia quacunque inferiore potestate tolli quouis modo non potest, scilicet, ut episcopatus, aut cura episcoporum non sit in ecclesia: hoc enim facere nec Papa potest, a quo hic ordo

uel officium non est, sed a Deo.

¶ Secunda conclusio sit, Vñ esse tantū in ecclesia sancta catholica episcopum, uerbo Christi institutū perpetuo. Licet enī Dominus omnes crearet episcopos Apostolos suos, nullus tamen eorum habuit successorē tanq̃ uerbo ipsius Christi institutum, nisi solus Petrus Apostolus: quia quod dictū fuit illi, Pasce oues meas, non minus dictum fuisse successoribus, censi debet.

¶ Tertia cōclusio, q̃ omnes reliqui particularium ecclesiarum episcopi prāter Petrum, id est, Rō. Pontificē, q̃ sint episcopi ab ipso Petro habent, non q̃ sint quasi delegati ab eo, aut eius uicarii, sed tanq̃ ordinarii, creati tamē ab illo. Nam in uniuersali cura Petro cōmissa, hoc simul cōtinebatur, ut prouideret particularibus prouinciis, & ciuitatibns. de episcopis, Quāobrem eius est diuidere diocesēs, & particularia ouilia, cum unum tantum uniuersale sit ouile de iure diuino, cuius pastor est Petrus. Sicut ergo eius est diuidere, ita etiam est unire. Et si cut imponere curam, ita etiam a cura ab

soluere, & mutare personas, & arbitrari
de cura, & de residentia, sicut uiderit ec-
clesiæ expedire. Hæc doctrina non est
mea, sed puto omnem uere Christianū
debere illam non solum concedere, sed
etiam profiteri. Quapropter doctor san-
ctus B. Tho. noster in plerisq; locis do-
cet, q̄ omnis potestas, præsertim spiritua-
lis in mundo, dependet ab hac potestate
suprema Papæ, unde omnes possunt di-
cere, inquit ille, De plenitudine eius om-
nes accepimus. Si igitur mea episcopalis
potestas, non est immediate a Deo, sed a
summo Pont. Papa, ab ipsius igitur pro-
uidencia regulatur.

¶ Quarta conclusio sit, qua respōdetur
quæsito, Quod episcopus nō tenetur ad
personalem residentiam assiduam in ec-
clesia sua de iure diuino, ita accipiendo
ius diuinum sicut expositum est: huius
autem conclusionis ratio ex supradictis
deducitur. Cum enim nulla Dei uox fa-
ciat hunc uel illum episcopum, ut dica-
mus immediate datam illi esse curam a
Deo, & consequenter præceptam resi-
dentiam, sine qua præstari cura non po-

test, sed hoc totum habeat a Petro, & ab ecclesia, profecto ecclesiastici iuris, & non diuini episcopi residentia est. Quamuis ergo episcopatus absolute in se consideratus, & cura illi annexa in genere de iure diuino sit, applicatio tamen ipsius episcopatus & cura, illi uel illi, quod istum uel illum habeat gregem sibi commissum, & isto seu alio tempore uel loco, non a Deo immediate est, sed a Petro, cuius cura (ut iam dixi) etiam hac erat, uidelicet, dispersiendi curam istam, & propterea creandi episcopos. Vnde B. Paulus, ut significaret quomodo episcopi sumus, dixit. In quo uos posuit Spiritus sanctus episcopos regere ecclesiam Dei, intelligens Spiritu sancto fieri, quod per praelatos rite disponitur. Itaque omnis obligatio particularis episcopi circa curam crediti sibi gregis ab eo descendit, a quo & episcopatum accepit. Vnde & normam curandi ab eo debet accipere, quam tamen etsi Petri sit tradere, non aliter tamen debet tradere, quam quemadmodum sibi tradita fuit, hoc est, in edificationem, non in destructionem, id est, ut pascant greges, non

semetipsos. Quamobrem licet Petri sit
& episcopos instituere, & similiter desti-
tuere ac mutare, non tamen hoc ei licet
pro uoluntate, sed ex causa, & ut uiderit
expedire ecclesiæ. Quod si aliter faciat,
non dicā non tenere factū, sed uere dicā,
de malefacto redditurū illum rationem
in die domini. At si uere esset hæc de iu-
re diuino (eo modo sicut est declaratū,)
nec talia posset facere Pontifex, nec si fa-
ceret, facta teneret. Hoc dixerim ut sane
intelligat lector quantū intersit inter ea
quæ iuris diuini sunt, quæ scilicet ab ore
Dei statuta & immutabilia sunt, & inter
alia quæ immediate ueniunt ab ecclesiâ.
Nam propter hoc necessaria est specula-
tio hæc discernendi, utrum hoc sit iuris
diuini, necne, & quatenus ut intelliga-
mus quid subdatur Pontificiæ potestati.
¶ Quinta conclusio sit, q̄ licet non te-
neatur episcopus particularis curare gre-
gem immediate præcepto Dei, ac pro-
pterea iure diuino, tenetur tamen ut ac-
cepit episcopatum, iure diuino parere.
Petro, qui portionem sui gregis ei di-
spartiuit in curam, et uocauit eum in par-

tem sollicitudinis, quia iuris diuini est illi
Petro obtemperare. Sicut enim tenetur
homo confiteri & communicare in so-
lennitate pascale, etiā sub poena damna-
tionis æternæ, nec tamen dicimus tali tem-
pore, aut tali die hoc fieri debere diuini
iuris esse, sed ecclesiastici, simili modo di-
cimus deberi curam & residentiam ab
episcopo, non quia diuini sit iuris in hoc
loco, uel tali modo, illum curare gregē,
sed quia iuris est diuini eum obedire Pō-
tifici, qui satis illud imperat (etiā si nihil
aliud expresse diceret) cum eam curam
impartit. Modus tamē curæ & residen-
tiæ determinatur ab ipso Pontifice in ca-
nonibus suis: quia quæ huiusmodi sunt
mutabilitati & uariationi subiecta sunt,
& ideo ad ius ecclesiasticum spectant, si-
cut accidit in iis quæ sunt iuris naturalis,
& indeterminata. Determinatio enim
eorū, & ipsamet, quatenus determinata
sunt, de iure ciuili esse dicuntur.

¶ Restat ergo nūc ut argumēta ex iam
suppositis diluantur, quod facile est. Fa-
temur enim primum episcopatum esse,
sicut diximus, de iure diuino, & curam

gregis annexam habere de iure diuino,
Applicationem tamen mei episcopatus
mihi cum omni sua obligatione, non es-
se immediate a Deo, sed ab homine. Vnde
a quo mihi episcopatus traditur, ab
eo & præceptū curæ & obligatio illius
curæ descendit. & ideo ex sui natura sub-
ditur ea cura & eius obligatio dispositio-
ni & dispensationi summi Pontificis, a
quo accipitur. Et hic est locus ubi deci-
pantur aduersarii, Putant enim ex hoc
quod episcopatus est de iure diuino, cō-
tinuo sequi de singulis episcopis, qui illi
uel illi loco applicantur, q̄ sint & ipsi a
iure diuino, hoc est, a Deo immediate,
ita ut non subiaceat episcopatus & cura
illa particularis residentię potestati &
arbitrio Papæ sicut uere non subiaceret,
si iure diuino, hoc est, a Deo esset cōmē-
data immediate. At non ita est. Sicut ex
hoc q̄ ieiunium est de iure diuino, non
sequitur q̄ ieiuniū quadragesimæ sit de
iure diuino, & consequenter imutabile.
Et similiter ex hoc q̄ esse respublicas &
magistratus in eis sit de iure naturali, nō
sequitur, ergo esse hunc & illū magistra-

tum signatū, est de iure naturali : similis
est deceptio in hoc processu. Homo est
dignissima creaturarum, ergo hic ho-
mo, uel ille, est dignissima creaturarum.
Manifeste peccat argumētum. Ita ergo
est in proposito, Et si episcopatus & esse
episcopos in ecclesia sit de iure diuino,
non tamē me esse episcopum est de iure
diuino, cum mihi talis episcopatus appli-
cetur medio Petro, id est, episcopo Ro-
mano. Solus episcopus Rom. immedia-
te a Deo applicatur personæ. Quamob-
rem non nisi soli Petro dictum legimus
a Domino Iesu Christo. Ego dabo tibi
clauēs regni cælorū. Reliqui enim a Pe-
tro ipso accipiunt, aut saltem sub Petro.
Hoc autem dico propter apostolos, qui
immediate acceperunt a Christo, qui
tanq̃ uere summus Pōtifex in hoc facto
Petrū præuenit. Cæteri uero omnes epi-
scopi, qui post apostolos fuere, sicut po-
testatem & curam a Petro acceperunt,
ita consequentissime ipsam curandī ob-
ligationem.

¶ Ea uero quæ afferuntur, q̃ nō pōt præ-
stari pastoralis cura sine personali & assi-
dua

dua residentia, nō habet euidentiā. Non enim euidens est, quod munera episcopalia, episcopus nō posset exercere per aliū, cum nullū suapte natura, sit indelegabile, ut patet: immo sunt casus pleriq; in quibus non solum licet episcopo abesse, uerum etiam necesse est, si propterea magis consulatur ecclesiæ suæ, aut ecclesiæ catholicæ. Sunt & historiæ de uiris probis & sanctis, qui nonnunquam, & per magna temporum interualla, ex magnis causis abfuerunt ab suo episcopatu. Beatus Timotheus Apostoli discipulus, etsi esset Ephesinus episcopus, tamen ad iussu Pauli, aliis ecclesiis inserviuit, unde iussus est ire Romā ab Epheso & Corintho, idq; non semel, & e Roma Hierusalem, ut nonnullam intercederentem, imo & frequentē pateretur cura episcopatus sui: quod de multis aliis per historias patere pōt. Sunt & casus in quibus licet dubitare an teneātur & quatenus, & ideo huiusmodi q̄ uariationē & dubitationē ex emergētibus casibus accipiunt, determinatio est sapientum, unde non possunt cōstanter dici esse iuris diui

nā. Nā quæ proprie iuris diuini sunt, certa sūt & imutabilia. Sed illud est (ut dixi) quod deceptionē facit, quia credimus q̄ quia aliquid in genere consideratum, est iuris diuini. V. g. curare oues, similiter ēē sit iuris diuini, si cōsideretur in particulari signato secūdum certos modos & cōditiones, quod est falsum manifeste, ut multis locis declarat B. Tho. exēpla sunt immunera, & iam dedimus, & addere ēē plura possemus. V. q. Præceptū obseruatiōis Sabbati, de iure naturali est et diuino, quatenus de determinata die intelligitur, & deindeterminato modo obseruantia. Quatenus uero determinatio facta ē ad certum diem V. g. quod septima die, ut obseruatio est Iudeorū, aut octaua die, sicut obseruamus nos, non est ex lege naturæ, quanquā ab initio fuerit ex lege Dei, qui diem septimum sanctificauit, propter beneficium creationis in ea die perfectum, & post modo lege Moseos confirmatum fuit. Non enim proprie Dei dicitur lex illa Moseos, tanquā quæ non immediate uenit a Deo: Decalogus autem a uoce Dei uenit. Sed non hic lo

cus disputare de singulis, declaro in lo-
co proprio & tractatu nostro de legi-
bus. Venio nunc ad resolutionem argu-
mentorum, quibus uidebatur ostendi ne-
cessitas residentiae ex iure diuino.

Ad primū igitur dico in duobus pecca-
re argumētū, alterū est quod Christi uer-
ba, Pasce oues meas, dicta sunt soli Petro
& non aliis Apostolis, & multo minus
ceteris episcopis: nec in Petri persona
alii subintelliguntur episcopi, quā Petri
successores, sicut Catholici contra Lu-
theranos euincunt, & ipse Caietanus.

Quare miror in hoc loco id non ani-
maduertisse uirū illum, nec item uidis-
se, quod peccat argumentū in eo quod
colligit Dominū, quia dixit Petro, Pa-
sce oues meas, intellexisse, ut per se illas
pasceret, & nullo modo per alios, quod
erat impossibile, quum totius christiani
gregis cura illi committeretur. At hoc
erat quod obiectabat Lutherus aduer-
sus Papæ potestatem. Lutherus enim ad
probandum quod non fuerūt dicta Pe-
tro illa uerba, Pasce oues meas, suppose-
bat q̄ dominus per ea uerba exigeret, ut

per seipsum pasceret oues, & cū id esset impossibile, concludebat quod illa uerba non attinebant ad ipsum Petrum. Nos autē cū Catholicis dicimus ea uerba & ad solum Petrum attinuisse, atq; adeo attinere, & tamē nō sit arcte intelligi, ut cogant eum omnes oues pascere p seipsum. Nam pastorum princeps, oues, quas per alios pascit, per seipsum pascere uidetur, iuxta regulam. Qui per aliū facit, per seipsum facere uidetur. Est autem error magnus (quod tamen quidā afferebant) Papam eodem modo eligi, et fieri ab hominibus, sicut cæteri episcopi: cum iuda sit electio in Pōtifice summo p homines, & nō collatio potestatis papalis. At episcopi sicut ab homine eliguntur, ita ēt ab homine potestatem & iurisdictionem accipiunt: aut mediante homine, cui hoc datum est nō solum habere potestatem, uerum ēt conferre. Et aliter circa hoc sapere, est desipere, est confundere, & doctrinam tradere schismaticam.

Ad secundum de descriptione boni episcopi quā facit dominus, nō uideo quā

rum urgeat. Declarantur enim ibi con-
ditiones boni pastoris, quæ proprie erant
ipsius domini. Nullum autem ibi præce-
ptum episcopis de residentia. Explicatur
autem quidam actus, ut est uocare oves
nominatim, & ante eas ire, qui uidentur
desiderare præsentiam pastoris. Sed quid
hoc ut intelligatur præceptum factum epi-
scopis a Deo immediate, & ad proban-
dum quod illa munia per alium fieri nequeant?
immo parabola illa re uera, non ad alium
pertinere uidetur, quam ad Christum. Vnde
Caiet. ibi sic ait. Secundum huius intimæ
intelligentiæ sensum, quilibet (solo Iesu
excepto) describitur hoc in loco mercen-
narius, seu non pastor, quia nullius sunt
oves propriæ nisi Christi &c. Cui autem
dubium, quod ad exemplum Christi formare
se quisque debet quantum potest, in quouis
statu fuerit? Sed nunquid propterea cum
descendimus ad particularia, elicere liceat
continuo diuinum præceptum ab eo quod
Christus fecit? Non puto, Quia enim
Christus comunicauit sub utraque specie
Discipulos, non cōfestim natum est præ-
ceptum diuinum, ut omnes sic facere te-

neantur: q̄q̄ hæretici aliter dicant. Neq̄
quia ieiunauit. xl. dies, idcirco erit præce-
ptum diuinum quadragesima, q̄q̄ habeat
rationem in iure diuino fundatam, quia
Christus sic fecit. Sed ut præceptum ex-
culperetur, oportuit ecclesiam hoc præ-
cipiēdo determinare. Sicut q̄ dies sancta
resurrectionis octaua hebdomadæ cele-
bris habeatur, non habet præceptum di-
uinū, tamen si a scripturis ducatur, q̄ præ-
cipi debuerit. Puto autem decipi plures,
qui ob id q̄ in scripturis sunt admoni-
tiones sanctorum, Prophetarum, & apo-
stolorum, episcopis ut curent gregem, ut
agnoscant uultum pecoris sui, & huius-
modi, continuo esse iuris diuini omnem
modum curandī existimant: quod non
concedimus, intelligendo ius diuinum
sicut habet hypothesis nostra.

¶ Mitto q̄ quædam admonitiones sunt
non præcepta, aut si præcepta sunt, non
sunt Dei præcepta, sed sua ipsorum pro-
phetarum & pastorum, ut quæ dicebat
B. Petrus inferioribus se Pascite qui in
uobis est, gregē. & Paulus, quando uetat
prophetari aut orari uelato capite, & nō

nulla alia quæ apud ipsum tantum legi-
tur, ut de digamia, & si qua huiusmodi.
Vnde & Salomon qui in prouerbis di-
xit, Agnosce uultum pecoris tui, non præ-
cipiens dixit, sed quod conueniebat me-
morauit.

¶ Quod si uelimus iuris diuini esse cun-
cta, quæ suggertur a Spiritu sancto uiris
Dei, & per ipsos mandata sunt in eccle-
sia, iam ad ius diuinum redigetur omne
ius ecclesiasticum & ciuile, quia per Deum
ipsum reges regnant, & legum condito-
res iusta decernunt. At hoc pacto iura ip-
sa confundimus & uane differimus, non
explicantes, sed implicantes. Quare & in
concilio Constantien. primo, quidam
Gratus episcopus hoc intelligens dixit,
Apostolorum statuta sunt, quæ dicunt,
Nemo militans Deo iugerit se negotiis
secularibus. Vide ut recte non est ausus
dicere, diuinum illud esse præceptum, sed
Apostolicum statutum.

¶ Ad tertium, quod dicitur episcopos
in locum Apostolorum successisse: Re-
spondeo non debere hoc intelligi respe-
ctu Apostolici muneris, quod erat per-

sonale, in quo erat etiam electa industria
personæ: immo ab ipso Christo erant ad
hoc ipsum aptati ac formati. Vnde non
licebat eis non euāgelizare, & in eo mu-
nere non habuerūt successores, sed in eo
tantū, quod & ipsi erāt episcopi. Quod
officium officio Apostolatus erat anne-
xum. Si enim apostolus, ergo episcopus,
non econuerso.

¶ Quartum argumentum facit pro no-
bis, Tū quia quod dicitur, Vade & præ-
dica populo Dei, non est uox Dei, sed ec-
clesiæ, unde cōuincitur potius hanc obli-
gationem non esse iuris diuini, sed eccle-
siastici & canonici: Tum uero quia ad-
huc non sic rigide est intelligenda, ut re-
neatur homo p seipsum prædicare, quasi
sit hoc Apostolicum munus, ut sic electa
sit persona ad euangelizandum, ita ut nō
ualeat per alios facere, sicut apostoli, qui
ipsi tenebantur prædicare. Nam aposto-
latus ille, & apostolorum prædicatio pro
infidelibus erat, ad cōuertendas gentes,
& fundandam fidem. Episcopalis uero
prædicatio est pro iam fidelibus, ut in fi-
de maneant. Vnde dicitur, Vade ad præ-
dicandum

dicandum populo Dei, & non dixit, gē-
tibus. Itaq; potest episcopus, imo debet
cum non sit ipse aptus ad prædicationē,
aut si inueniat aptiores, sufficere illos ut
hoc munus impleant loco sui. Alioquin
peccasset sanctus Valerius Hypponenſis
episcopus qui B. Aug. in hoc opus substi-
tuit loco sui, de quo tamen a prudētibus
est cōmendatus. Et idem fecerunt innu-
meri & sancti Pastores, quos uelle dāna-
tos esse ob hoc ipsum, temerarium est.
¶ Ad quintum, q̄ oportet episcopū esse
doctorem, non negamus. Nec tamen, si
non sit doctor, nō erit episcopus: sed pec-
cabit qui talem elegerit imperitum, &
ipse quoq; qui munus acceptauerit, cū
se minime esse idoneum poterat agno-
scere. Nec tamen doctrina episcopi pro-
pter hoc tantū requiritur ut ipse assidue
prædicet, sed ut possit etiā de alienis do-
ctrinis iudicare, & saltē docere, siue præ-
sens sermone, siue absens per epistolas (ut
faciebat B. Paulus & alii Apostoli) exhor-
tari, instruere, consolari. Quod & olim
faciebant episcopi eruditi, ut D. Cypria-
nus, Ambrosius & alii. Quare doctrina

non semper nec assidue exigebat præsenti-
tiam. Itaq; ratio ista non probat obliga-
tionem ad assiduam residentiam, quam
etsi probaret (cum nos eam non nege-
mus) non tamen probaret eam esse de iu-
re diuino, nisi eo modo quo declarau-
mus. Quare eadem ratione soluuntur, q̃
de aliis officiis episcopi allata sunt. Non
enim negamus officia ab episcopo debi-
ta: nec item inficiamur q̃ rationabiliter
ipse illa per seipsum præstare potius de-
beat q̃ per alium, si tamen fieri potest ut
solus unus omnia præstet: quod certe mi-
nime fieri posset, præsertim ubi diæcesis
fuerit nimis ampla. Doctrina enī & præ-
dicatio requirit totum hominem. Mes-
sis autem cum sit multa, & officia erga il-
lam multa, requirit etiam cooperatores
multos. Quare non conuenit dicere, q̃
episcopus illa omnia & singula per seip-
sum exercere sit astrictus. Vnde legitur
Decretum concilii generalis sub Inno-
centio, ubi mandatur episcopis, ut ido-
neos uiros habeant, quibus committant
& prædicationes, & uisitationes, & au-
dientiam confessionū, & alia quæcunq;

pertinent ad salutem animarum. Quinto
imo correctiones & uisitationes, et emē
dationes in ecclesiis & in clero, Itē exa-
minationes promouendorum siue ad sa-
cros ordines, siue ad beneficia, per archi-
diaconos ex officio fieri consueuerunt,
sicut docent sacri Canones. Quare fal-
sum apparet, quod proponūt nonnī qui-
dam tanq̃ axioma, dicentes absolute, epi-
scopi officia eē personalia, nec posse per
alios administrari.

¶ Illud omnino onerosum est, quod ē
dicūt esse munera propria episcopi quæ
propriū loci requirāt ep̃m, & ab aliis
episcopis exerceri iure non possunt. Fru-
stra ergo introducti sunt Coadiutores.
Quid enim si proprius episcopus infir-
metur? quid si necessario fuerit peregri-
nus, aut exul, aut ad curiam uocatus ex
magna causa, aut ad concilium? His casu-
bus, si cura illa, ut uolunt, tam assidua de
iure diuino exigitur, & per alios præstari
nō potest, quid hic fiet? an hæc sunt per-
accidens, ut dimittantur ab arte? Et cur
non liceat uti opera ac ministerio titula-
rium episcoporum? Aunt horum crea-

tio est per accidens. Sed quæ consequen-
tia, ut non liceat eorum opera uti ac mi-
nisterio, si bonum fuerit et necessarium?
Imo ipsimet qui hoc negāt, uī ueritatis
tandem in necessitate concedunt. Sunt
tamen qui uelint huiusmodi episcopos
titulares non esse, quoniam omnes mali
sunt. Sed cur tales creantur qui sunt ma-
li? an quia titulares, idcirco boni esse nō
possunt? Verum huius rei cognitio, ui-
delicet, utrum sit bonum destituere hos
episcopos, Papæ est, nō nostra. Mihi bo-
na ratione instituti esse uidentur. Si quid
uero circa hoc peccatur, ut eligātur ma-
li, hominum uitio dandum est, non ipsi
rei. Nam & sæpenumero etiam non titu-
lares, mali eliguntur & creantur: & hoc
sane est p̄ accidēs, & cōtra uerā normā.
¶ Ad aliud uero principale argumētū,
falsum est quod sumitur, uidelicet, q̄ si
hoc non sit diuini iuris, uidelicet, præce-
ptum residentiaē personalis, posset con-
traria consuetudine tolli, quoniam talis
consuetudo esset abusus. Sicut enim om-
nis lex debet esse iusta & ratiouabilis, ut
sit lex, ita & consuetudo non ualet, neq̄

etiam est dicenda cōsuetudo sed abusus;
cui ratio manifeste repugnaret. Non au-
tem cōuenit rationi, ut prælati a Spiritu
sancto positi in cura ouium Christi, q̄q̄
mediante Petro, ab illa cura sine ratione
se expediant, & sine particulari & iusta
causa, cuius tamen iudicium summi Pa-
storis est. Nec ualde mirum quod hoc
argumento motus fuerit Caietanus, pu-
tans q̄ ius positiuū facile tolli posset cō-
suetudine: ignorabat enim iura, & id qđ
Gregorius nonus ca. fi. recte docuit his
uerb. s, Licet longæuæ consuetudinis nō
sit leuis autoritas, non tamen est usque
adeo ualitura, ut uel iuri positiuo debeat
præiudiciū generare, nisi fuerit ratio-
nabilis & leg. time præscripta. Hæc ille,
cui magis hac parte credendum est, q̄ Ca-
ietano.

¶ Fateor tamē q̄ poenæ quæ lege eccle-
siastica statuuntur nō residentibus, cum
ratio huiusmodi statutorum sit subiecta
uariationi, et ideo merito pati posset mu-
tationē, possunt longa desuetudine tolli.
At absolute q̄ non resideāt episcopi, nec
expressa lege fieri potest a Papa: quoniā

manifestam iniquitatem contineret, & contra ipsius rei naturam. Contra ius diuinum ergo faceret Papa, relaxando residentiam, cum (sicut diximus) sit diuini iuris ut ipse eam præcipiat, quam tamen eo ipso præcipit, quando curam imponit, quatenus tamen ad curam exigitur, quum iure diuino ipse teneatur pascere omnes oues, aut per se aut per alios. Nā quia omnes nō potest per se, saltem per alios hoc agere debet: quod profecto nō faceret, si omnino residentiam tolleretur. Ipse ergo summus Pont. habet a iure diuino, ut præcipiat residentiam & eius modum, iis quos elegit in pastores. Præceptū uero ipsius residentiae ab ipso Pont. habet episcopus, ut patet, non a iure diuino. Nec potest circa hoc passim & absq; causa dispensare Papa sine animæ suæ periculo, quia potestas illi data est in edificationem, nō in destructionem, id est, ut oues curentur, non ut negligant. Tamē ad illum pertinet determinare ac moderari residentiam, & poenas pro arbitrio ponere.

¶ Ad illud uero tertio loco adiectum,

quo sic arguit quidam. Si de iure diuino
est, quod debeat merces episcopo, etiā
iuris diuini esse debet, q̄ teneatur impen
dere officium suum, & propterea etiam
residentiam. Quod argumētum si pro
bat, etiā probat quod de iure diuino de
bet religiosus prædicationē suā popu
lo, quoniā & illi (ut nemini dubium est)
si prædicauerit, de iure diuino debetur
stipendium uitæ. Et similiter si iuris diui
ni est q̄ detur merces mercenario, etiam
iuris diuini erit ipsum mercenarii opus,
& sic omnes artes mechanicæ erunt iu
ris diuini. Hoc argumentū erat eius ma
gistri qui nuper scripsit de residentia ne
cessaria episcoporum.

¶ Ad illud uero quod quarto loco di
ctū est, uidelicet, Si tolleretur præcepta
residentiæ, nōne adhuc deberetur? Quod
si deberetur, quo ergo iure. nisi diuino?
Respōdeo, Si absolute tolleretur præce
pta a canonibus, proculdubio non debe
retur de iure diuino. Quod si dicas, er
go posset episcopus non residere impu
ne: fateor. At inquires, Nonne hoc est ab
surdum, & quammaxime? Verum quid

obstat uno dato absurdo sequi aliud? Dices, Ante canones ergo licebat episcopū non residere? An nō dixi q̄ semper mādata fuit ab ecclesia residentia, quatenus n̄ exigeret ipsa demandata cura? Quod si etiam expressum non fuisset, tamen in episcopi creatione subintelligeretur. Cōfestim enim ut creatur episcopus, ipso facto iniungitur illi onus curādī gregem, Sed hoc illi ab ecclesia, sicut Petro a Christo: & ideo quatenus poscit cura, eaten⁹ debetur residentia. Et quia in hoc plura occurrunt, de quibus merito dubitatur circa residentiam episcopi, ideo determinanda est ab ipsa ecclesia. Et per hoc nō solum satis fit argumento, sed ueritas etiam magis patet.

¶ Quod uero postremo de sponsa, & spōso affertur, facit pro nobis: quoniam manifeste uidemus q̄ Papa amouet ac disiungit episcopum a sua ecclesia, & in aliam transfert, quam illi coniungit. Et sunt Canones, qui hanc potestatem probant, nec ullus Catholicorū negat: quod certe facere Papa non potuisset, si illa cōiunctio fuisset a Deo immediate stante Christi

Christi uerbo, Quos Deus cōiunxit ho-
mo non separet. Si enim carnalia matris
monia separare non potest, quātū mī-
nus spiritualia? Verbum igitur Domini
hoc, uidelicet, Quos Deus cōiunxit ho-
mo non separet, in ipso Pōtifice, & uni-
uersali ecclesia, cui uere a Deo ipso sum-
mo immediate coniungitur, uerum esse
apparet: quoniam hoc spirituale uincū-
lum solui non potest, nisi ab ipso Deo.
Non est enim potestas in terra quæ ua-
leat destituere nec Papatum, nec ullum
Papam, qui uere sit Papa, id est, saltem fi-
delis. A Papa uero destitui quidem epi-
scopatus, id est, officium & ordo nequa-
quam potest, episcopus uero ille uel ille,
potest, ut auferat summus Pōtifex ab eo
curam, & si quidem adsit causa iure fa-
ctum erit, si autem non adsit causa, ni-
hilominus cura ab eo sublata erit. Pon-
tifex autem de iniuria rationem reddet
Deo. Nec propterea manet ecclesia illa
uiduata sponso suo quoniam (ut elegan-
ter docet B. Tho. in Opusc. xix. cap. iiii.
circa finem) Christus proprie loquēdo
est sponsus ecclesiæ. Alii autē qui sponsi

dicuntur, sunt ministri sponsi, exterius
cooperantes generationi filiorum quam
facit Christus, qui & dicuntur sponsi in
quantum cooperantur uice sponsi qui
est Christus. Et ideo Papa qui obtinet ui
cem in tota ecclesia, uniuersalis ecclesie
sponsus dicitur. Episcopus autem, sue
dioecesis, Presbiter autem, sue parochie.
Vnde & dioecesis sponsus Papa est, &
parochie episcopus &c. Vide igitur or
dinem bone lector, nec turberis, quum
audis residentiam episcopi particularem
non esse preceptam iure diuino, & cum
hoc tamen, absque causa Papam dispensare
non posse: quoniam de iure diuino habet
papa ut curet oues, contra quam curam
facit, si circa residentiam dispense ad li
bitum. Omnis enim dispensatio debet
esse cum ratione quam probet Deus. Ra
tio autem dicat, ut precepti ouibus oues
curent: & ideo necessarium est Pontifi
cem id curare, quod in se est, & quod
sibi mandauit Deus de uniuersali eccle
sia, & aliis demandare, & ita modum cu
rae dispensare, ut gregis detrimentum per
incuriam non contingat.

¶ Vtrum autē rationabiliter cum Cardinalibus, & aliis curialibus, puta, cum auditoribus Rotæ, siue Cameræ, aut clericis Cameræ, aut Vicariis suis, aut gubernatoribus urbis, aut custodibus arcis sancti Angeli, & aliis huiusmodi, possit dispensari, aut cum ratione, siue tacite, siue expresse dispenses, sicut uidemus passim fieri, alia quæstio est, circa quam (si tractabitur in synodo) libere tūc atq; ingenue dicā quod sentio: Nihil enī prohibet in curia multos esse abusus, qui propter longam consuetudinem, & nullam animaduersionem, ac magnam huius seculi cæcitatem, non solum fiunt & permittuntur, uerum etiam (quod est longe calamitosius) iam abusus non reputantur. Videat ergo tandem Deus, & apponat oculum misericordiæ suæ, ut & nos recipiamus uisum, & nemo ausit dicere bonum malum, & malum bonū: nec ullo præstigio obicere nobis tenebras pro luce.

¶ Illud uero quod exigunt assiduam residentiam personalem episcopi in sua dioecesi, non habet uanam rationem: quoniam

si uelit officium suum facere bonus pastor, uix minimum supererit ei tempus, quo uacare possit a cura. Et nihilominus hoc assiduum, non cum rigore, sed iuxta humanam æquitatem ac rationem accipiendum est, & illo utendum prouerbio. Ne quid nimis, Et, Oibus in rebus modus. Hic non omittam quod Caietani doctrinam hoc in loco non capio. Ipse enim, ut superius deduximus, facit hoc præceptum affirmatiuum gratia materiæ obligare ad semper, ac deinde uult gratia materiæ hoc præceptum quod obligat ad semper, posse aliquando licite non seruari, & ita sine uiolat õe præcepti, quod obligat ad semper gratia materiæ, posse episcopum non semper residere gratia materiæ. Hæc enim sunt eius uerba. Et quoniam obligatio ista ad semper ex parte materiæ est, & materia ipsa mutabilitati subiecta est, idcirco contingit absque uiolatione præcepti episcopum non semper residere &c. hæc ille. & post hæc soluendo argumenta dixit. Ad primam objectionem (quæ erat quod in pluribus casibus licitum est non residere) dicitur quod

quia præceptum hoc est affirmatiuum,
nihil obstat, quod in multis casibus con-
tingit licite non residere. Qui potest, in-
telligat. Mihi enim ista non aliud dicere
uidentur, nisi quod hoc præceptum resi-
dentiae etsi sit affirmatiuum, cuius natu-
ra est ut non obliget ad semper, ratione
tamen materiae habet, ut naturam affir-
matiui non seruet, ac per hoc obliget ad
semper. Et rursum licet ratione materiae
obliget ad semper, tamen contingit in
multis casibus licite non seruari, tum ra-
tione materiae, tum quia præceptum est
affirmatiuum, cuius natura est non obli-
gare ad semper.

¶ Ecce igitur Reuerendissimi Caietani
doctrina de præcepto residentiae. Primū
quod obligat ad semper, quia sit præceptum
affirmatiuum, & hoc ratione materiae.
Rursum hoc præceptum quod ratione
materiae, etiam sit præceptū affirmatiuū,
obligat ad semper, potest tamen sine sui
uiolatione nō semper seruari, & hoc ra-
tione materiae, & quia præceptū est affir-
matiui, ut huc tandē sit ueniendū, Obli-
gat ad semper, & non obligat ad semp.

Et itē, ratione materiæ obligat ad semp,
& ratione materiæ nō obligat ad semp.
Et itē, licet sit affirmatiuū obligat ad sem-
per: & quia est affirmatiuum, nō obligat
ad semp. Profecto hæc doctrina ex eius
uerbis elicitur. Et ideo non imerito pu-
to me dixisse, Qui potest intelligat: q̄q̄
non dubito facile inueniri posse, qui etiā
sic dicentem uelint defendere, nec defo-
re illis subtilissimas aliquas glosas, quas
tamē, si bene perpenderent, nec ipsi pro-
barent. Defendant ergo qui uelint, non
censebo operæpretium cōtendere, cum
non de re, sed de hominis errore agatur:
quem in plerisq; aberrasse, non est qui,
in (saluo pudore) ualeat inficiari. Mihi
autē illud semper probatissimū
fuit, quod ait Scriptura,
Doctrina prudens
tunc facilis.

CENSURA F. AMBROSII CATHARI
rini Politi episcopi Minorienſis in libellum
quendam inſcriptum, Controuerſia
de neceſſaria reſidentia
epiſcoporum.

AD REVERENDVM DOMINVM
et in Chriſto magnopere obſeruandum et colen-
dum patrem D. Franciſcum de Nauarra epiſco-
pum eccleſiæ Pacenſis. F. Ambroſius Cathari-
nus epiſcopus Minorienſis. S.



MAGNOPERE cuperem Reue-
rende Domine ac pater in Chriſto
multa ueneratione colende, illud
nunc mihi contingere, quod aiunt
indifferenter optaſſe Socratem, ui-
delicet, hominũ pectora eſſe fenestrata, ut quod in cor-
dibus lateret, ibi planè inſpici poſſet. Si enim hoc pacto
poſſes intima mei cordis tuæ mētis oculis penetrare,
et perſpicuè contēplari, uideres proſectò, uideres inq̃,
et ſincero erga omnem fratrem me eſſe animo, nec ſolũ
ex ueritate me loqui (quod eloquar) uerũ etiam ex cha-
ritate. At quoniã id fieri non poteſt, ut occulta mei cor-
dis tibi nunc pateant, eo recreor, quòd non cõmittam,
quãtum ſinet humana fragilitas, ut per meum aliquod
ſiue dictum ſiue factum, quiſq̃ ualeat aliud de me me-
ritò ſuſpicari. Quòd ſi qui aliter cenſuerint, cõſolabor

me ipsum à uerbo magni Apostoli, aientis. Mihi pro
minimo est ut à uobis iudicer, aut ab humano die: Qui
iudicat me dominus est. Et illius præmonitione fretus,
hortabor ne quis uelit ante diem iudicare, quàm uenerit
Dominus illuminans abscondita tenebrarum, & manife
stans consilia cordium, ut quisq; ab ipso pro meritis refe
rat laudē suam. Dices, quorsum hæc tu ad me? Accipe.
Aedidit libellum frater Bartholomeus Carranzam de
Mirada familiaris tuus, tibiq; (ut scio) charissimus, cu
ius libelli titulus hic est. Controuersia de necessaria re
sidentia personali episcoporum, & aliorum inferiorum
pastorum Tridenti explicata per fratrem Bartholo
meum &c. Ipsum amplitudini tuæ inscripsit. Is in eo
apud multos & pios & graues uiros, & apud omnes
Patres rei gestæ gnaros, summopere ac uehementer of
fendit. Quare inuitus & dolens coactus sum censuram
super illum cōponere, & eam itidem dicare tibi, non
alio animo, q̃ (ut prædixi) sincero, & quē proculdubio
si cerneres, certò scires à charitate moueri. Quod autē
& à ueritate, existimo neminē negaturum, quātacunq;
erga illū beneuolentia afficiatur, modo talem se mihi
præstet, qualem non solum Apostolica sentētia, uerum
etiam philosophica cōmonitio postulat. Apostolus ait,
Charitas cōgaudet ueritati. Philosophus inquit, Decet
amatorem sapientiæ, in gratiam ueritatis etiā propria
destruere: nam cum ueritas & Plato amici sint ambo,
sanctius est honorificare ueritatem, Vale mi Domine
summopere mihi honorande atq; colende,

Præfatio

PRAEFATIO AD LECTOREM.



ON AB RE, nec absq;
magna & assidua necessita-
te edoctus à uerbo CHRIS-
TI magnus ille Aposto-
lus, eius frater Iacobus præ-
cipit. Nolite plures magi-
stri fieri fratres mei, scien-
tes quòd maius iudicium su-
mitis. Sciebat enim in hominis conditione innatam &
magnam ad errandum procliuitatem, & ingentem
nihilominus ad docendum alios cupiditatem: quomodo
uix ullum peruersius, unde sapienter adiecit. In mul-
tis enim offendimus omnes. Si quis autem in uerbo
non offendit, hic perfectus est. Cui si hac parte ob-
temperatum fuisset, profectò non tam magnum ma-
gistrorum prouentum nobis. nostra hæc infœlix ætas
attulisset, nec per eos uniuersum scindi orbem in di-
uersas partes conspiceremus, sed sua pace frueretur
ecclesia.

Hoc uerò non propter eos dixerim, qui manifestè
sunt hostes ecclesiæ, de quorum resipiscencia uix ulla
spes, Sed propter nos ipsos qui (gratia Dei) perma-
nemus unanimes in eius domo, ne quis nostrum præ-
nimia huius magisterii auiditate, aut arrogantia, im-
prouide offendat aut excidat: Aut si quis iam se la-

bentem, aut lapsum sentiat, contineat & erigat se.
Vix enim ego opusculum de episcoporum residentia
quorundam praeibis adductus scripseram, ubi, qua-
tenus, & quo iure illa exigatur, pro mea qualicunq;
facultate differui (etsi nondum in lucem prodierat,
& quia morabatur iudicium doctorum) quum per-
uenit ad me nouus cuiusdam magistri libellus eiusde
ferè argumenti, quo perlecto, cum mihi sit ille amicus
& frater in domino, uehementer dolui, quòd perspe-
xerim illum in hoc Apostoli praeceptum miserabili-
ter commisisse, ut qui in multis uehementer offende-
rit. Offendit enim satis in titulo: offendit & in epi-
stola nuncupatoria plus satis: denique & in toto ipso
tractatu plurimum & passim offendit. Admonuissem
uerò de hoc hominem amicè, & iuxta ordinem fra-
ternæ charitatis ad aurem, si res integra esset, hoc
est, si factum non esset publicum, & tale per quod
imperiti, ac rerum ignaris, ad scandalum ac seditio-
nem facile possit imponi. Malignis autem etiam præ-
beri materiam oblatrandi serendiq; calumnias in do-
mum Dei ac S. Synodum. Quãobrem non studio con-
tentionis, neque causa depressionis amici ac fratris,
quem diligo in ueritate, sed officii gratia (quod &
illi, & omni populo, ac præsertim sanctæ Synodo, me
debere intelligo) de hoc libello quid sentiam, in mo-
dum censuræ libuit paucis (quãtum fieri poterit) per-
stringere. Audi ergo benigne lector & Christiane
pacis amator.



RIMVM dixi hunc hominem of-
fendisse in titulo, qui huiusmodi est.
Controuersia de necessaria residen-
tia personali episcoporum, & alio-
rum inferiorum pastorum, Triden-
ti explicata per fratrem Bartho-
lomæum Carranzam de Miranda &c. Cum uerò ex
his uerbis tituli manifestissime indicetur controuer-
sum fuisse in sancta Synodo, utrum necessaria sit epi-
scoporum residentia in suis ecclesiis, & hoc omnino
sit falsum, quid esse dixerim hoc aliud (si suo uerbo
explicanda sit res) quam palam calumniari, & iniu-
ria Synodum infamare? cum reuera tantum absue-
rit ut ulla ibi de hoc orta fuerit controuersia, ut
econtrariò uniuersi Patres semper & uno ore, nul-
lo prorsus excepto, necessariam esse personalem re-
sidentiam & confessi fuerint, & hoc ipsum nouo De-
creto confirmauerint, & nouas etiam pœnas, ut ser-
uaretur, adiecerint. Nam quomodo poterat hoc in con-
trouersiam deduci, quod iam per plurimorum Pon-
tificum canonibus, & conciliorum statutis sancitum
erat prius?

Nec uolo mihi respondeat, dicens controuersum
fuisse in Synodo an residentia hæc præcepta esset iu-
re diuino. Primum quia neque hoc est uerum, cum
Reuerendissimi D. Præsidentes hanc questionem pro-

hibuerint in controuersiam uenire, aut quouis modo tractari in Synodo, idq; prudenter omninò, cum eius generis ea esset quæstio, quæ poterat inter Catholicos salua fide & charitate disputari. illius autem resolutio minime ad rem faceret, cum residentiaë debitum nemo negaret, & poenæ congruentes non residentibus in arbitrium Synodi relicerentur. Præterea demus illi hoc falsum pro uero, quòd ibi hæc quæstio tractata fuerit, uidelicet, an residentiaë præceptum sit de iure diuino, cur non explicuit uir iste in titulo? Nunquid sorte apud eum idem est dicere simpliciter, utrum necessaria sit residentia, & dicere, utrum iure diuino sit necessaria? Aut ex hoc ipso quòd asseratur non necessaria de iure diuino, continuo sequitur, Ergo simpliciter non necessaria, sicut quidam mihi pro illo respondit. At hoc hæreticum esset, & Lutheranum, cum illi nullum præceptum admittant, nisi diuinum. Falsus igitur omninò & calūniosus est hic titulus, ut qui facile præbeat occasionem malignis traducendi nomen nostrum, & blasphemandi apud eos qui schismatico spiritu concitati de seditionibus gaudent ac scissuris.

Illud uero quod adiecit explicatam à se fuisse hanc controuersiam Tridenti, queso te prudens lector, nō ne uidetur sapere illum spiritum, quem (ut à principio dixi) frater Domini uituperat ac prohibet: illam nimirum nostram nimiam cupiditatem, qua haberi uolumus & uocari Magistri, quorum est implicita

explicare? & ita facile in eiusmodi iactantias efferi=
mur, unde aliis uel mouemus stomachum propter ar=
rogantiam, uel excitamus risum propter insipientiã.
Ignotum uerò erat hoc huius tam præclarum facinus
explicandi controuersias Synodorũ, nisi ipsemet quasi
tuba omni populo præcinnisset, seseq; indicasset eum
esse, qui faceret utraq; paginam. Nam reuera no=
his qui ibi aderauus, absconditum penitus erat uer=
bum hoc, & nunc etiam nescimus qua potestate uel
autoritate Tridenti id egerit, ut explicauerit contro=
uersias Synodi. Omissem profectò hanc hominis ua=
nitatem ut uanitatem, neq; mihi mouisset stomachum,
quia stoccificissem, neq; excitasset risum, quia cõmi=
seratus potius fuisset, utpotè amico & fratri in Do=
mino, nisi iudissem per hæc uana, apud rude uulgus
obscurari atq; imminui existimationem S. Synodi. Pu=
tant enim homines, uiros huiusmodi qui adunt opera
sua publicè, ac præsertim tanta autoritate sententias
proferunt, & explicatores controuersiarum se (inte=
rim tacente Synodo) profitentur, alicuius esse eximii
nominis ac spestatæ doctrinæ, quales esse deberèt qui=
bus habenda sit fides. Vnde necessaria fiat censura,
tum ad retundendam calumniam, tum ad arrogantiam
comprimendam.

Dixi secundo offendisse hunc hominem etiam in
epistola. Scripsit nuncupatoriam epistolam ad insi=
gnè Præfulem, quã ego etiam colo & ueneror tamq̃
patrem in Domino, tum ob illius insignes uirtutes,

tum quod & in mea episcopi consecratione instru-
ctor astitit. Mitto ergo quæ in laudem illius præfa-
tur, quæ & nos in illo agnoscimus, & gaudemus: quæ
illud ei tribuerit, quod offendere possit nonnullos.

Primum, cum hanc uniuersam huius temporis ca-
lamitatē ordini episcoporum acceptam referat; unum
solum excipit, ipsum nimirum Pacensem episcopum.
Mitto quod non erat monachi tantum ordinem indif-
ferenter, & tanta macula, conspurcare, & cum alio-
rum iniuria unum solum excipere. Nec enim puta-
mus ipsum pro sua modestia & equanimitate, hanc
suam laudem tam singularē libenter agnoscere. Mit-
to quod etiam CHRISTI uicarium agere illum
simpliciter ait.

Nemo autem simpliciter agere CHRISTI ui-
carium dicitur; præter summum Pont. Romanū, de
quo singulariter Carolus ille cognomento Magnus,
hoc est professus his uerbis. Ipse est qui uices Dei
gerit in terris. Hoc igitur alii simpliciter tribue-
re, ut iste fecit, iam est insolens, etsi forte aliquan-
do ab aliquo sit usurpatum, sicut alia quædam, a qui-
bus meritò abstinueremus; hoc præsertim tempore
quando noui hæretici æquant Rom. Pontificem auto-
ritate ac potestate ceteris episcopis. Verum excuse-
mus ut impropriè atque improuidè dictum, & ex-
pendamus alia quæ non solum habent errorem, ue-
rùm etiam calūniam pessimam ac intolerabilem: hæc
sunt eius uerba.

Quoniam & nunc ascendunt contra CHRISTI
ecclesiam armati filii Moab & Amon, sicut & tunc
contra Iudam & Hierusalem. Ridebant nostri aduer-
sarii mores & abusus hactenus, nec immerito qui-
dem, ridebant etiā nostram doctrinam, sed falso, nec
ullis cavillis aliquid potuerunt obtinere non labē non
rugam ostendere. Nunc uerò (quod prae dolore scri-
bere uix possum) uereor, ut Sathan nec hanc partem
reliquam nobis faciat, nisi nos ipsos opponimus eius
ualidissimo arieti. O pater non satis erat periclitari
in moribus, & in ea parte male audire, nisi peri-
clitemur etiam in doctrina. Exoriuntur enim (ut au-
dio) nonnulli, qui nunc tandem in dubium reuocant,
unde episcopi originem ducant, iure diuino, an hu-
mano fuerint constituti, tum etiam an teneantur prae-
sentes episcopi suas oues pascere, an uerò satis sit
mercenarium pastorem gregi praeficere, ut ipsi à cu-
ra soluti, alias res agant, hoc est, ut alter nomine qui-
dem sit episcopus, & ob hoc oues tondeat, ne dicam
deglubat. Alter conductitijs, pastoris obeat munus.
nonne sunt doctrinae, nec dubito, quin illarum, quas
Paulus uocat Demoniorum? hac ille.

Audet igitur uir iste eos Praesules, qui catholico
nomine censentur, insimulare nō iam de abusus, sed
de crimine pessimo, hoc est, de praua doctrina, &
illa quam Demoniorum doctrinā Apostolus uocat. 1. Tim. 4.
Quid poterat grauius in nos impingere? Quis ergo
ferat hanc calumniam tam apertam, tam insignem?

Alloquar hominem. E hō bone uir dic nobis, quæ nam hæc est tandem doctrina demoniorum: nempe, reuocare in dubium unde episcopi ducant originem, & num diuino, an uerò humano iure sint constituti? Verum qui sunt isti qui hæc in dubium uocant? Audio, inquis. Itāne ergo leuis es, ut de fratribus & presulibus tantum flagitium audiens, tam facile credas, & ita leuiter credens etiam tam dure inueharis, scilicet solo commotus auditu, ut cognita tandem ueritate uel exponas te ludibrio propter leuitatem, uel maleuolentiæ & odio, propter calumniam adeò manifestam? Quis enim non potius credat te ipsum hæc monstra tibi confinxisse quæ superares? Alioquin cur antequā publicè scriberes, non curasti fieri certior, & nosse qui talia uel dicerent uel scriberent, ut postmodo iure illos posses reprehendere, ac (si opoteret) etiam pro tua autoritate, quam tibi sumis, duriter obiurgare, ne uidereris, sicut nunc uideris, potius optare pugnam, ac de pugna uictoriam tuam, quā Christianam pietatem ac pacem? & ita potius desiderare homines, quos spiculis tuæ doctrinæ prosternas, quā quos, si rectè sentire nouisses, amplexareris ut pios? Quis autem est qui non rectè sentiat hac parte? Quis enim non dico Patrum concilii, sed omnino qui Christianæ religionis primis elementis imbutus fuerit, ignorat CHRISTVM ordinasse Beatum Petrum Apostolum episcopum uniuersalis ecclesiæ, & per illum posse alios, ac debere creari episcopos

††eente

crescente ecclesia, & propterea episcopatus ordinem & officium ab ore Domini & Dei nostri fuisse institutum ac profectum? de quo etiam credibile est quod reliquos Apostolos creavit pastores, sicut habet præfatio ecclesiastica ad canonem Missæ, quos tamen ipsi Petro subiecit. Hæc nullus negat, imò nullus negare, nisi uel proteruus, uel omnino stultus, potest. Et certè contra hoc in Synodo uerbum nullum. Illud item prætereà quod adiecisti, Tum an teneantur episcopi, qua fronte (quæso) adiecisti, ò amice? Imò quo animo? nonne in fellis amaritudine cum uerbis adeò insolentibus & contumeliosis? Considera uerba tua quæ citavi, & agnosce esse calumniosissima & contumeliosissima in Patres, cum nec in mentem sani hominìs uenire queat, ut de eo dubitet quod ipse fingis, ullum ex Patribus dogmatizare. Aliud est episcopum non curare gregem, quod multis fortè contingit, ut hoc faciant cum animæ suæ discrimine. Aliud uerò asserere aut dubitare (ut uerbis tuis utar) utrum liceat episcopo à cura se soluere, ut nomine tantum ipse sit episcopus, & oues tondeat aut potius deglubat: quod nemo tam perfrectæ fontis posset unquam sibi uertere in quæstionem, nisi si quis fuerit omnino exors & insanus. Salua igitur res tibi erat circa doctrinam, optime frater, nec oportebat ut te ipsum accingeres, ac te opponeres (ut ais) huic ualidissimo arieti Satanae. Nemo enim hunc mouere potest, nisi

Et ipse sit aries. Qui tamen si quis eum moueret,
non ualidissimus esset, sed infirmissimus, nec multas
uires posceret ad retundendum. Parce ergo quæso,
parce tantis uiribus tuis, Et serua eas tempori op-
portuniori, aut in hostes potius conuerte, non in nos,
quos non debuisti putare arietes, ne in uacuum cer-
tans, ipso impetu nihil offendens, tuas ipse uires, ac
temetipsum inutiliter frangas. Quod si tanto dolo-
re comprimeris propter abusus, quātum exprimis,
usurpans tibi Apostoli uerbum, Tristitia magna Et
Rom. 9. continuus dolor cordi meo Et c. scito magis te pro-
fecturū taciturnitate, oratione, Et lachrymis, quā
isto uerborum strepitu, quo si quid agis, magis sto-
machum moues, Et odium Et irreuerentiā plebium
in prælatos, quā ullam in eis emendationem ope-
reris: quia grauem te correctorem non aspiciunt.
Sed ad rem redeo.

Dixi tertio hunc hominem non minus offendisse
tam in tractatu suæ controuersie circa doctrinam,
quā uel in titulo, uel in epistola circa positionem
controuersie, quod Et facile indicabo cum Dei gra-
tia; Non quod sit animus notare singula, ne bonas
horas male collocem. Pauca enim satis erunt, de qui-
bus cætera qualia sint, facile poterit prudens lector
existimare, Et clarè prospicere quā sit idoneus
uir iste ad controuersias Synodorum explicandas.
Primum igitur magistraliter (ut ita dicam) ingre-
diens disputationem, proponit (ut eius uerbis utar)

explicari per duo axiomata totum statum præsen-
tis controuersie, & ait. Eorum ad quæ legibuste-
nemur, quedam sunt iure diuino præcepta uel pro-
hibita, quæ nullam institutionem habent à iure na-
turali, ut baptizari aqua, & usus aliorum sacra-
mentorum. Alia uero iure naturali prohibita, quæ
nullam institutionem habent à iure diuino, ut fura-
ri, moechari &c. Alia autem ab utroq; iure prohi-
bita sunt, uel præcepta, uerbi gratia, reuerenter tra-
ctare sacramenta, mundum sumere coenam Domi-
nicam, ne liceat uendere sacramenta, uestem aut præ-
bendam, quia sacra est. hæc pendent ab utroq; iure,
qui in istis offendit omnia iura uiolat naturalia, &
diuina &c. & adiecit tandem. Huius tertii generis
sunt quæ iure controuertuntur de residentia mini-
strorum ecclesiasticorum. hæc ille. Nunc obsecro te
bone lector attende.

Primum hic Magister noster tradens doctrinam
eorum quæ legibus præcepta sunt, uel prohibita,
& in membra recolligens, ea tantum proponit
quæ iure diuino, uel naturali præcepta sunt, uel
prohibita, ita ut hoc tam pulchro & spectabili prin-
cipio se ostendat uel omnino hæreticum, si præter
legem diuinam, aut naturalem, neget esse ecclesia-
sticam, & ciuilem: Aut indoctum prorsus, si fortè
quæcunq; sunt legis ecclesiasticæ, aut ciuilis, ponat
esse etiam iuris naturalis, aut diuini: Aut certè in-
consideratum ac præcipitem sicut in calumniando,

ita & in docendo, præsertim quòd in hoc uersaba-
 tur status questionis propositæ, uidelicet, utrum re-
 sidentia esset potius de iure ecclesiastico, quàm de
 iure diuino. Debit ergo ius ecclesiasticum ad rem
 propositam uenire in numerum. Proinde quis ferat
 quod ait, Ne quis furetur, aut ne quis mœchetur,
 non esse ab utroq; iure prohibitum, & non habe-
 re nouam à iure diuino institutionem. Nam quæ ta-
 lia sunt, id est, utroq; iure præcepta siue prohibita,
 in tertio suæ diuisionis membro conclusit: quæ res
 omnem illi elabendi rationem intercipit. Si ergo nos
 hoc in libro suis illum uerbis compellāremus & ur-
 geremus, quòd hæc uerè est doctrina Dæmoniorum,
 quid (rogo) haberet quod iure posset respondere?
 Et tamen, ut ei parcamus, inconsideratum illum po-
 tius arbitrari uolumus, quàm uel hæreticum, uel
 indoctum, & imperitum docendi, uel etiam mali-
 gnū: quāuis quod ipse audet, & tanto spiritu pro-
 nunciat, sit mera hæresis & intoleranda, & ipso pri-
 mo auditu absurda, uidelicet, rerum sacrarum uen-
 ditionem & naturali & diuino iure prohibitam,
 Furtum uerò & adulterium non iure diuino, tan-
 quā lex Decalogi non sit ius diuinum, & tanquā
 uerbo C H R I S T I non sit probatum & confir-
 matum, cum etiam dixerit, Qui uiderit mulierem
 ad concupiscendam eam, iam mœchatus est eam in
 corde suo. Quare qui hæc mandata transgreditur,
 non punitur quasi legis tantam naturalis uiolator,

Matth. 5.

sed in primis diuine, sicut docet Apostolus cap. 7. ad Rom. & Ecclesiasticus cap. 23. mulierem adulteram uituperans ait. Primò, inquit, quia in lege altissimi incredibilis fuit. Secundo, quia in uirum suum deliquit. Mitto quæ de sacrarum rerum uenditione dicere possum. Hactenus credo iustificabor ab æquo iudice de eo quod iam censui, cum dixi, de paucis quæ de propria hic protulerit officina, posse facile cætera coniectari: nondum tamen illum dimittam, nisi prius absoluam de toto opere censuram, nempe hanc.

Primum in maiore sui operis parte, ubi apparet esse aliquid, frustra disputat, quia cum assidue pugnet, contra neminem pugnat: non ferè ubique inculcat necessariam esse episcopis residentiam ad ouium curam. At hoc ego etiam iterum atq; iterum inculcabo, Quis hoc negat?

Secundò ubi opus erat fortiter agere, dum nititur probare præceptam esse residentiam de iure diuino, incipit elanguescere. Citans enim scripturas ueteres, ut per eas hoc nobis probaret, primò & ultimò locum sumit à sensu mystico, & allegorico, per ipsum tamen confecto: quàm uerò ineptè, relinquo lectori iudicandum. Quod satis est, ut cognoscamus abundantes huius magistri diuitias in argumentando, dum ad reuincendos aduersarios, utitur figuris & sensibus mysticis, quos ipse tamen commentus est, nec meminit Beatissimi Dionysii senten-

tiæ, & Augustini, & Thomæ, & omnium dicentium
hoc genus argumenti esse inualidum. Et tamen, ut
simus nos benigniores in hunc hominem, admitti-
mus hunc locum, sed dicimus militare aduersus il-
lum. Ipse enim ex uerbis Domini quæ præcepit Le-
uitis Num. 18. dicens. Excubate in custodia sanctua-
rii, & in ministerio altaris, ne oriatur indignatio
super filios Israel &c. colligit præceptum residen-
tiæ esse de iure diuino: quia illi ad quos loqueba-
tur, mysticè significabant personam Romani Ponti-
ficis, & inferiorum pastorum. Ego uerò qui aliquan-
do in studio Iurisconsultorum uersatus sum, respon-
deo illi, Inciuile est non tota lege perspecta, de una
eius aliqua particula iudicare, uel respondere.
Ideoq; o amice, perpende superiora quæ ad Aaron
summum sacerdotem prædixerat Dominus Deus,
prædixerat enim. Excubabuntq; Leuitæ ad præce-
pta tuâ, & ad cuncta opera tabernaculi &c. Ex
quibus apparet quod excubatio minorum Leuitæ-
rum de præcepto summi Pontificis pendebat, &
non iure diuino immediate, nisi quod erant iure di-
uino obligati parere Pontifici. Hoc est autem quod
nos dicimus in proposito. Mitto (ne tempus amit-
tam) aliud citatum locum expendere. Mirum enim
quàm nihil faciat ad rem. Reliqua uerò quæ de sa-
cris literis producit, quia iam patebant in libello
nostro, non omittuntur, & (ni fallor) facile resol-
uuntur.

Tertio, quod uehementer uelim animaduerti, in capite sui libelli septimo, plura de conciliis asserunt, unde probet residentiam legibus canonicis conciliorum, & summorum Pontificum inueniri præceptam. Quod reuera non solum non militat contra nos, sed contra illos egregie qui uolunt hoc esse diuini præcepti. Nam quod est diuini præcepti, non oportet à conciliis præcipi, imò indignum esset ac præposterum si hoc fieret. Vnde B. Paulus de his quæ præceperat Dominus ait. Non ego, sed Dominus. Solummodò si opus esset, per concilia declarari posset aliquid esse diuini iuris. At uerò statui, minime: ne uerbo Dei fieret contumelia. Quã obrem hoc est pro nobis magnum & urgentissimum argumentum, quòd nulla Synodus, nullus Pontifex, in suis ipsorum canonibus dicunt episcopos non residentes directe contra ius diuinum agere, sed benedicunt eos agere contra canonum instituta, aut, si quid amplius, contra Apostolorum statuta, quatenus non faciunt nisi canonica iura. Videat qui uult. in tit. de cler. non resid.

Quarto, mitto quàm indistincte & confuse semper loquatur. Istud singulariter est adnotandum, quòd hic Magister non solum falso & calumniose passim hanc opinionem pergit nobis impingere, uidelicet, quòd opinemur episcopos non teneri ad residentiam, quàm exigit debita cura gregis, sed (quòd omnem calumniam superat) addit nos putare con-

trarium esse à sacra scriptura præceptum, hoc est, sacros canones hac de re contra scripturas militare. Nam cap. 7. fol. 33. & 34. cum exposuisset pro astruenda residentia, canonem concilii primi Carthaginensis, adiecit hæc uerba. Nunc uerò contrarium putant nostri episcopi præceptum à sacra scriptura, Nisi uelit hoc dictum excusare, quòd satis hoc putare creduntur, cum id ipso facto declarent, non obtemperando canonibus. Verum non sic erat loquendum homini disputanti pro ueritate. Hic enim modus proprius est auctoritatem habentis, & corripientis cum imperio, & non monachi, cuius proprium erat, sua potius & aliorum peccata deflere, & non in maiores, & præfules Christiani gregis tanto stomacho inuehi, & si bona pars nostrum digni essemus opprobrio illo, non tamen ille dignus qui diceret, præsertim cum multi proferri possint, qui & bonæ mentis sint, & magna cura satagant pro suarum ouium salute.

Quinto, quia neminem alium habebat hic Magister, qui hanc tractauerit questionem in propriis terminis, uidelicet, An residentia personalis assidua sit præcepta de iure diuino, tandem Card. Caietani solius nititur auctoritate. Excusat autem Patres antiquos hoc in terminis non tractasse, quia, inquit, non cogitabant fore tantum scelus in ecclesia, sicut respondit Solon rogatus cur non tulisset legem in parricidas. Nunc rogo primum ab hoc homine, quid est hoc

est hoc scelus quod non cogitabant Patres fore in ecclesia? nunquid non curare gregem, & non resistere? hoc cunctis est ergo quod non putabant Patres fore in ecclesia? Quid ergo ipse agit toto opusculo ostendens à scripturis uituperatum esse hoc crimen, & à conciliis prohibitum, & a ueteribus sanctis doctoribus improbatum? Quomodo ergo non cogitatum fore in ecclesia?

Dicet forte, non hoc est quod aio, non putasse Patres ueteres, uidelicet, non fore hoc scelus, sed non fore qui illud defenderent, & ideo non proposuisse questionem in terminis. Ecce rursus calūnia, cum nemo sit qui defendat peccatum, imò nemo qui non improbet ac detestetur.

Dicet, cur ergo putatis non esse hoc iuris diuini præceptum? Respondemus, quia non apparet in scriptura præceptum, & nullus patrum hoc dicit, & Canones potius oppositum arguunt, ut deduximus, & in proprio libello abundius (ni ualde fallor) & à ratione terminorum, & de fundamentis scripturarum, ualde comprobauimus. Et ideo hoc putare non est quasi scelus parricidii, quod sua atrocitate esset omittendum ne commemoraretur, ut iste uult, in atrocem multorum Patrum iniuriam, præsertim cum si iuris diuini sit, oportuerit inueniri apertum hoc in scripturis, & aperte nobis ostendi: quod certe nullus ueterum fecit, ut ipsemet comprobauit, qui tamen tanto spiritu pronuntiat atrox

adeò scelus nostrum, quod nesciamus quæ Patres non docuerunt.

Dicet, Quid respondes ad Reuerendissimū Cardinalem Caietanum, qui tractauit in terminis questionem hanc, & pie & sanctè resoluit eam, concludens residentiam à iure diuino præceptam? Respondeo primum, quòd in hoc paupertatem hominum agnoscimus, qui cum alios non habent quos adducant, in uno tantum autore innituntur, nempe Cardinali Caietano, tanquā ille non in multis errauerit & pernitiose: quæ si quis uelit defendere, parum profectò catholicum se comprobabit. Deinde respondeo, quòd Caietanus mutauit sententiam: nam quæ ex illo citantur, ea dixerat anteq̃ esset Cardinalis, postremò Cardinalis creatus, longè aliud fecit. Nam clarè constat eum Cardinalem iam creatum, etiam episcopatum acceptasse, & tamen non resedisse: quæ si pium & sanctum arbitrantur (ut iste ait) quòd pie & sanctè illud docuerat, & nonnulli etiam prædicant eum sanctum, de quo non contendo, Quomodo ergo commisit tantum scelus atq; adeò horrendum, quod minime esset cogitandum futurum, tanq̃ parricidium apud Solonem? Et profectò si de uiro probo & sancto intelligimus quiddam aliquando ab eo dictum, postremò uerò aliter ab eo factum & seruatum, credendum est, ipso facto illum à suo dicto iam recessisse, Ergo pro nobis potius militat Caietanus, si uelimus eius autoritate inniti. At ego, etsi

reuera nec eius dictum probem, neque eius factum,
hac parte probare ausim, in aduersarios tamen, qui
in uiri huius autoritate mirifice confidunt, hæc me-
ritò & cum magna ratione reiecto: quoniam dum
uolunt illum efferre in cœlum, ut doctrinæ autori-
tatem extollant in eo quod probant, infamant po-
tius, cum facto in hoc non probauerit doctrinā suam.
Verum quòd & eam questionem tractans docendo
multum errauerit Caietanus, satis mihi uideor in
proprio tractatu de episcoporum residentia demon-
strare: uideat & censeat qui uult.

Denique quia hic homo dum scripturarum &
Patrum autoritate innititur, aliquando proprias
etiam intermiscet rationes, unam tantum quæ face-
re deceptionem imperitis facile posset, inducam: ait
enim. Si iuris diuini est quòd debetur merces epi-
scopo, consequenter diuini iuris erit quòd teneatur
impendere plebi suæ officium curæ, & idè etiam
residentiam. Quod argumentum si probat, etiam
probat, quòd de iure diuino debet religiosus præ-
dicationem suam populo: quoniam etiam illi si præ-
dicauerit, iure diuino (ut nemo dubitat) debetur sti-
pendiū uitæ. Et similiter probat, si diuini iuris est
quòd mercenario cuilibet debetur sua merces, etiā
diuini iuris erit ipsum mercenarii opus, & ita om-
nis ars mechanica, & opera cuilibet impensa erit
diuini iuris. An non meritò dixi quòd ex paucis, cæ-
tera huius hominis cōsiderari possunt qualia sint? si

tamē pauca sunt quæ dixi, imputandū tamen illi qui suppeditaui materiam. Vale lector & disce non facile fidere in huiusmodi nouis Magistris, etsi se ualde strenuos ipsimet ostendent. Tunc enim eis tantum minus fidendum est.

Vnum tamen penē mente exciderat, optime lector, commemorandum, quod ab hoc uiro desiderasssem. Ipse enim uolens contumaciam multorum episcoporum arguere, qui contra Synodorum præcepta agentes, secularium principum fauore seipsos excusant, quo minus ad hoc generale concilium conueniant, postquā canonem octauæ Synodi protulit aduersus eos, sic ait. An non tibi uidetur loqui de Synodo Tridentina tam infrequenti? Hic non reprobō dictum: quoniam uerum & opportunum, refero enim hoc benignē ad tempus quando erat Synodus Tridentina. Verū desiderasssem ut illius concilii auctoritate similiter nunc uteretur, & urgeret etiam pro Synodo Bononiensi; una enim Synodus est, eadem necessitas, obligatio eadem, & illius canonis præuariatio (ut potest cunctis piis constare) minime cessat. Vale iterum bone lector, & censuram nostram ut maxime opportunum, & ab inuito, nec sine dolore exortam, boni consule.

FINIS.



RECISTRV M.

A B C D E F G H I.

Omnes sunt Duerni.

VENETIIS APVD GABRIE-
LEM IOLITVM DE EER-
RARIIS. M D X L V I I.



